

25 Aña dunando asistencia na nos mucha y hobennan

ARIBA 20 di november na aña 1999 tawat'e prome biaha cu un mucha aki na Aruba por a haci uzo di sosten emocional, informacion y conseho pa medio di e number 131. Despues di lunanan di preparacion, e liña di ayudo pa mucha y hoben aki na Aruba a bira realidad ariba 20 di november 1999.

Tawata un grupo di persona den nos comunidad cu e tempo ey caba a mira e necesidad pa dun'e grupo di mucha y hoben cu despues di ora di scol no tawatin un persona adulto pa comunica cu ne, e oportunidad di tin un persona pa scucha nan. Situacion financiero di nos famianan y emancipacion di hende muhe a pone cu e hende muhe tambe a cuminsa labora. E mucha y/of hoben su so na cas despues di oranan di scol a haci su entrada aki na Aruba. E mucha/ hoben tawata yega cas y no tawata tin un persona na cas p'e por a papia tocante di con su dia a bay.

Cu tempo a ripara cu no solamente nan tawata comunica cu 131 pa tin un acompañamento, pero tristesa, rabia y miedo tambe tawata motibonan p'e mucha y hoben tuma contacto. Esaki a pone cu e organisacion a keda profesionalisa su mes durante añanan. E asistencia tur atardi di 2or te cu 6or pa medio di telefon, e-mail y chat ta ser duna pa aproximadamente 40 mentor cu ta personanan semi profesional cu tur aña ta ricibi minimo tres training grandi.

131 ta funda basa ariba e principionan di e Tratado Internacional di Derecho di Mucha. E trabao di nos organisacion ta concentra su mes ariba tur e articulonnan cu ta forma e tratado aki, pero tin dos articulo cu repetidamente ta presenta bek den tur locual ta ser haci door di 131. Aki ta trata di articulo 12 y 13 di e tratado cu ta subraya cu muchanan tin e derecho di tin y duna nan mes opinion ora ta trata topiconan cu tin di haber cu nan desaroyo. Pa



medio di tur e servicionan cu e mucha y hobennan ta ricibi for di 131, nan por haya informacion, crea nan opinion y siña con pa expresa esaki na un manera respetuoso.

Locual 25 aña pasa a cuminsa como un iniciativa, awe ta un reda di seguridad y apoyo pa mucha y hobennan ariba nos isla cu no tur ora tin e sosten na cas. Cu un promedio di 13.000 contacto pa aña, 131 lo sigui brinda sosten na nos mucha y hobennan di Aruba. E mucha y hoben ta den pleno desaroyo y ta actornan social den nos comunidad. Nos ta partner di e mayor den educacion di su yiu. Hunto cu e mayornan, e sosten di 131 ta sumamente importante den e desaroyo di e mucha y hoben.

Di telefon pa e-mail, sigui p'e sistema di chat y website y fortalece p'e charla, workshop, proyecto y training na mucha, hoben, mayor y profesional. Origina na Aruba y asistiendo awor tambe e mucha, hoben y profesional

ariba e islanan di Boneiro, St. Eustatius y Saba. Nos ta cla p'e siguiente 25 aña. 131 semper lo t'ey pa bo.

Den e trabao importante aki nos ta sumamente agradecido di por ricibi sosten di mayor y partnernan local y internacional. 131 kier a gradici mayornan y tur nos partnernan local y internacional cu ta tuma nan impacto social na serio y ta inverti den e mucha-, hobennan y famia aki na Aruba.

Un gradicimento special ta bay na Setar N.V., Aruba Airport Authority N.V., The Salamander Group, Web Aruba N.V., Kiwanis Club of Palm Beach, Rotary Club of Aruba, Aruba Lions Club, RBC Royal Bank, Qwihi y MetaCorp cu ta haci hopi trabao di 131 posibel.

Pa mas informacion tocante trabao di 131 por tuma contacto cu 131 via nos website: 131.aw, facebook: <https://www.facebook.com/aruba.131/>, e-mail: 131aruba@gmail.com of telefon 5886138/ 5884011.